



## Komunikado

27 di òktober 2022

### **Cft: "Sòru pa aprobá presupuesto na tempu"**

**Philipsburg – Den kòmbersashonnan resien Kolegio di supervishon finansiero Kòrsou i Sint Maarten (Cft) a urgi Sint Maarten pa aprobá e kambio di presupuesto 2022 i e presupuesto 2023 riba término kòrtiku. E kambio di presupuesto 2022 ta enserá un montante di ANG 15,4 mion pa invershon, pa kua Sint Maarten ke hasi uso di e registrashon koriente di Hulanda. Invershonnan dirigí ta duna un kontribushon na kresementu ekonómiko duradero. Mas aleu e Lei di Reino tokante di supervishon finansiero pa Kòrsou i Sint Maarten ta indiká ku promé ku 15 di desèmber 2022 Sint Maarten mester tin un presupuesto 2023 aprobá. E presupuesto ei mester tin un ekilibrio riba e servisio ordinario.**

Ekonomia di Sint Maarten a krese den 2021 ku 8 porshento. Fondo Monetario Internashonal ta premirá pa aña 2022 un kresementu ekonómiko di 7,5 porshento. E rekuperashon di turismo ta e motibu prinsipal tras di e kresementu ekonómiko aki. Den e próksimo añanan Sint Maarten lo mester usa e rekuperashon ekonómiko pa pone finansa públiko na òrdu i kumpli ku su obligashon di paga debe.

#### **Presupuesto 2022 i 2023**

Den yùni Sint Maarten a proponé un kambio den e presupuesto di 2022. Ku esaki a redusí e défisit riba e servisio ordinario te ANG 99 mion. For di e ehekushon di 2022 ta resultá ku e entradanan i e gastunan ta desaroyando di un forma mas favorabel. Konseho di Minister di Reino resientemente a determiná ku pa 2022 ta permití un défisit di ANG 40 mion riba e servisio ordinario. Den 2022 Sint Maarten a risibí 24 mion di sosten di likides. Konseho di Minister di Reino tambe a stipulá ku den 2023 mester yega na ekilibrio riba e servisio ordinario. Den 2025 Sint Maarten mester paga un fianza di ANG 73,5 mion. Pa e motibu ei ta di importansia pa e pais realisá surplus den añanan 2024 i 2025. Segun e Lei di Reino tokante di supervishon finansiero pa Kòrsou i Sint Maarten promé ku 15 di desèmber 2022 mester tin un presupuesto aprobá. Sint Maarten a indiká ku e lo entregá mas lihé posibel un proyekto di presupuesto 2023 na Parlamento, pa e presupuesto por keda aprobá mas lihé posibel.

#### **Invershonnan**

Te ainda Sint Maarten a hasi invershonnan mínimo for di servisio di kapital den aña 2022. E kambio di presupuesto di 2022 ta enserá un montante di ANG 15,4 mion na invershon, di kua ANG 10 mion ta pa infrastruktura di kaya. Invershonnan dirigí ria tereno di infrastruktura ta duna un kontribushon na kresementu ekonómiko duradero. Pa e invershonnan aki Sint Maarten ke hasi uso di e registrashon koriente di Hulanda. P'esei Cft ta insistí serka Sint Maarten pa e pais aprobá e kambio di presupuesto 2022 rápidamente, ya por kuminsá start e prosedura aki. Den aña 2023 i e añanan despues tambe Sint Maarten ke hasi inverson. E invershonnan riba e servisio di kapital mester kuadra ku e invershonnan pa kua tin finansiamentu di e fondo fiduciario. Cft a urgi Sint Maarten pa bini ku un planifikashon di invershon di mas aña i pa Sint Maarten hasi uso di e eksperiensianan ku Banko Mundial i e Ofisina di Programa Nashonal di Rekonstrukshon na momento di hasi kontratashon,.

#### **Subida di entrada di impuesto**

Ku aproksimadamente 17 porshento di e produkto interno bruto (GDP), internashonalmente mirá e entradanan di impuesto di Sint Maarten ta abou. Sint Maarten mester subi e entradanan di impuesto, pa e por generá surplusnan. Cft a konsehá Sint Maarten pa e hasi lihé ku introdukshon di un impuesto pa casino i un impuesto riba benta pa importashon privá di produktonan. Tambe Sint Maarten ta implementando impuesto riba estadia pa esnan ku ta hür kas ku turista. Durante di kòmbersashonnan ku Minister di Finansa i e Grupo di Guia di Transformashon Fiskal, Cft a enfatisá ku modernisashon di e sistema di impuesto i di e Servisio di Impuesto ta nesesario pa por mehorá kumplimentu ku pago di impuesto.



### **Kuido i seguridat sosia**

Den 2022 Sint Maarten a dal e promé pasonan pa por realisá ekonomisashon den e sistema di kuido. A subi e límite di sueldo di ZV/OV i ta implementá e lei tokante di introdukshon di remedi genérico. Cft a papia ku e Minister di Salubridat Públiko, Desaroyo Sosial i Labor tokante di e reformanan planeá i e importansia di un pronósiko realístiko di mas aña. Cft ta konsehá Sint Maarten pa implementá pronto e reformanan nesario, pa asina ei redusí e défisitnan den e fondonan di kuido i pa evitá ku e país mester kontribuí strukturalmente na e fondonan di kuido. Un ehèmpel ta ku e kontribushon propio di e empleadonan públiko mester kuadra mas ku esnan di sektor privé.

### **Maneho finansiero**

Sint Maarten ta hasiendo progreso ku mehoramentu di su maneho finansiero i aprobamentu di kuentanan anual. Sint Maarten a eliminá retraso den e kuentanan anual i a limpia vários kuenta (transitorio). Lo aprobá e kuentanan anual di añanan 2019 i 2020 den novèmber 2022. Revisamentu di e proseso presupuestario ta finalisá i lo terminá un análisis di e prosesonan di trabou finansiero riba término kòrtiku. Cft ta enfatisá kon importante ta pa implementá e prosesonan di trabou revisá mas lihé posibel i salvaguardiá esakinan den un struktura. Di e manera aki por mehorá kalidat di e maneho finansiero den forma struktural. Ta premirá ku fin di 2022 lo aprobá e kuenta anual di 2021.

Riba 25, 26 i 27 di òktober 2022 miembronan di Cft a hiba kòmbersashon ku Gobernador, Konseho di Minister, Minister di Finansa, Minister di Salubridat Públiko, Desaroyo Sosial i Labor i komishon finansiero di Parlamento di Sint Maarten. Cft a kòmbersá tambe ku representantenan di e Grupo di Guia di e fondo fidusiaro pa rekonstrukshon, Grupo di Guia di Transformashon Fiskal, Grupo di Guia Maneho Finansiero i e Órgano Ehekutivo di Seguro Sosial i di Seguro Médiko.

[Fin di komunikado]

#### **Fotógrafa:**

Ton Verkuijlen

#### **Teksto pa foto:**

Den e próksimo añanan Sint Maarten lo mester usa e rekuperashon ekonómiko pa pone finansa públiko na òrdu i kumpli ku su obligashonnan di pago di debe.

#### **Nota pa redakshon – no pa publikashon**

##### Kontakto na Cft:

Sekretariado Kolegionan di supervishon finansiero

Telefòn +5999 461-9081 / +5999 461-9082 / +5999 461-9084

Email [info@cft.cw](mailto:info@cft.cw)

Website [www.cft.cw](http://www.cft.cw)

##### Persona di kontakto pa prensa:

Jefka Martina

Telefòn +5999 512-6861